



Жанубий ҚОЗОҒИСТОН

janubiy.kz

1991 йил 5 апрелдан чиқа бошлаган
Сешанба, пайшанба ва шанба кунлари чиқади

2023 йил 9 ноябрь, пайшанба, №124 (3320).

ҚАЙТА ТИКЛАНУВЧИ ЭНЕРГИЯ – КЕЛАЖАККА САРМОЯ



ДАВЛАТ РАҲБАРИ SVEVIND ENERGY GROUP КОМПАНИЯСИ БОШ ДИРЕКТОРИНИ ҚАБУЛ ҚИЛДИ

Учрашувда Мангистов вилоятида амалга оширилаётган “яшил” водород ишлаб чиқариш лойиҳаси муҳокама қилинди.

Президент мамлакатимизда қайта тикланувчи энергия манбаларидан фойдаланиш бўйича сармоявий жозибадорликни ошириш чора-тадбирлари ривожлантирилаётгани ҳамда улардан ишлаб чиқариладиган энергия бозорида қулай рақобатбардошлилик ҳамда ишбилармонлик муҳити шакллантирилаётгани, “яшил лойиҳалар”ни рағбатлантирувчи нарх ва тариф сиёсати такомиллаштирилаётганини таъкидлади.

Давлат раҳбарига тақдим этилган маълумотларга кўра, Европа Кенгаши президенти Шарл Мишелнинг утган йили Қозоғистонга ташрифи чоғида имзоланган Сармоявий келишуви доирасида дастлабки лойиҳа-қидирув ишлари (Pre-FEED) бошланган.

Лойиҳа сувни чуқурлаштириш заводи, қуввати 40 ГВт қувватга эга қайта тикланувчи энергия станцияси (шамол, кўёш), шунингдек, йилига 2 миллион тонна “яшил” водород ёки 11 миллион тонна «яшил» аммиак ишлаб чиқарадиган 20 ГВт қувватга эга сув электролиз заводи барпо этиш ва фойдаланишни назарда тутди. Дастлабки сармоя миқдори 50

миллиард евродан зиёд. Лойиҳа ҳужжатлари 2026 йилгача якунланади. Инфратузилма қурилиши 2027 йилга, фойдаланишга топшириш эса 2032 йилга режалаштирилган.

Қасим-Жумарт Тўқаев Hyrasia One лойиҳасининг ўз вақтида амалга оширилиши мамлакат учун стратегик аҳамиятга эга эканини таъкидлади.

Давлат раҳбари мазкур лойиҳа Қозоғистонда қайта тикланадиган энергия манбаларини ривожлантиришга салмоқли ҳисса қўлишига ишонч билдирди.

Akorda.kz.



ЖИНОЯТЧИЛИККА ҚАРШИ ҚУРАШДА ХАЛҚАРО ҲАМКОРЛИК

Қозоғистон ва Кипр ўртасида жиноий ишлар бўйича ҳуқуқий ёрдам кўрсатиш тўғрисидаги битим ратификация қилинди. Хусусан,

Давлат раҳбари қуйидаги қонунларни имзолади:

- “Қозоғистон Республикаси ва Кипр Республикаси ўртасида жиноий ишлар бўйича ҳуқуқий ёрдам кўрсатиш ҳақидаги шартномани ратификация қилиш тўғрисида”.

- “Қозоғистон Республикаси ва Кипр Республикаси ўртасида жиноятчиларни тутиб бериш бўйича шартномани ратификация қилиш тўғрисида”.

- “Евроосиё қайта сугурта қилиш компаниясини ташкил этиш бўйича битимни ратификация қилиш тўғрисида”.

Akorda.kz.

ШҲТ ҳудудида хавфсизлик масалалари муҳокама қилинди

Ўзбекистон пойтахтида ШҲТнинг “Ишонч, ҳамкорлик ва касбийлик – хавфсиз келажак гарови” мавзuida тўққизинчи халқаро илмий-амалий анжумани ўтди.

Тадбирда ШҲТга аъзо давлатларнинг ваколатли органлари, халқаро ихтисослашган ташкилотлар вакиллари иштирок этди.

– ШҲТга аъзо давлатлар ваколатли органларининг ҳудудимизда мувофиқлаштирилган ҳолда ишлаши ва ўзаро ахборот алмашиши натижасида террорчилик ташкилотларининг 73та махфий тузилмалари фаолияти тўхтатилди, 69та террорчилик хуружининг олди олинди, 507 нафар жиноятчининг шахси аниқланиб, 447 нафари қўлга олинди, 54 нафари судланди, 182 нафари зарарсизлантирилди, 13166та молиялаштириш манбалари аниқланди. Ҳамкорликдаги саъй-ҳаракатлар натижасида дунёвий тармоқда терроризм ва экстремизмни тарғиб этувчи 25 мингга яқин ахборот-захира материаллари муҳосара қилинди, – деди ШҲТ Ижроия кўмитаси директори Руслан Мирзаев.

ШҲТ хавфсизлик масалалари билан бир қаторда савдо-иқтисодий, сиёсий, инновацион, маданий-гуманитар ва бошқа соҳалардаги ҳамкорликка ҳам катта эътибор қаратмоқда.

24.kz.



Туркистонда II Туркий Универсиада бошланди. Қардош мамлакатлар спортчилари иштирок этган мусобақанинг тантанали очилиш маросими “Карвон саройи” мажмуасининг “Show arena” биносидида ташкил этилди.

Халқаро тадбир иштирокчиларига Туркий давлатлар ташкилоти Бош котиби ўринбосари Сади Жафаров, Қозоғистон Республикаси Фан ва олий таълим вазири Саясат Нурбек ҳамда вилоят ҳокими Дархан Сатибалди муваффақият тилади.



– Туркий оламнинг маънавий пойтахти – муқаддас Туркистон шаҳрига ҳуш келибсиз! Сизни кучоқ очиб кутиб олган шаҳримиз қадимдан туркий оламнинг муҳим маркази бўлиб келган. Бу шаҳарда туркий оламнинг машҳур мутафаккири, буюк устоз Хожа Аҳмад Яссавий умргузаронлик қилган. Туркистон бир неча асрлар давомида Қозоқ хонлигининг пойтахти бўлган. Хожа Аҳмад Яссавий мақбараси ёнида 21 нафар қозоқ хони, султонлари ва қаҳрамонлари дафн этилган. Бугун қардош мамлакатларимизни мана шу

муқаддас заминда кутиб олиш биз учун улкан шараф ва фахрдир. Туркий мамлакатларнинг иккинчи Универсиадаси юқори савиядаги халқаро мусобақага айланиб бормоқда. Бугун туркий оламнинг 6 давлатидан иқтидорли спортчилар ташриф буюрди. Мусобақа иштирокчиларига омад тилайман! Кўп асрлар давомида дунё тан олган эр Туркнинг авлодларисиз! 3 кун аввал пойтахтимиз Астана шаҳрида Туркий давлатлар ташкилотининг ўнинчи саммити ўтди. Унда қардош давлатлар ўртасида тинчликни мустаҳкамлашга

ТУРКИСТОНДА – ТУРКИЙ УНИВЕРСИАДА



қаратилган муҳим қарорлар қабул қилинди. Иккинчи Туркий Универсиадасининг мақсади ҳам шу. Биз барча қардош давлатлар билан ҳар томонлама алоқаларни мустаҳкамлашга бор куч-ғайратимизни сафарбар этамиз. Туркий мамлакатларни бир-бирига яқинлаштирадиган йирик лойиҳаларни давом эттирамиз. Барчангизни Универсиада бошланиши билан чин қалбимдан табриқлайман! Ёшларимиз жаҳон мусобақаларида ҳамisha ғолиб бўлишсин! Туркий олам ғалаба қозонсин! Дархан Сатибалди Туркий давлат-

лар ташкилоти раҳбарияти ҳамда Қозоғистон Республикаси Фан ва олий таълим вазирлигига мусобақани тарихий шаҳарда ўтказишда кўрсатган ёрдами учун миннатдорчилик билдирди.

Мусобақанинг очилиш маросими юқори савияда ташкил этилди. Даставвал “Спорт, спорт” номли хореографик театрлаштирилган композиция томошабинлар эътиборига ҳавола этилиб, “Бирдамлик маскани” сахна кўриниши орқали туркий мамлакатларнинг бирлиги улуғланди. Вилоятнинг истеъдодли санъаткорлари ижросида ватанпар-

варлик руҳидаги, шу жумладан, “Қозоқ юрти”, “Туркистон”, “Ақ қурай”, “Турон даласи” каби кўшиқлари янгради.

Туркий универсиадада Туркия, Озарбайжон, Ўзбекистон, Венгрия, Қирғизистон ва Қозоғистондан 500 нафарга яқин спортчи иштирок этмоқда. Улар шахмат, стол тенниси, волейбол, дзюдо, футбол, юнон-рум кураши, эркин кураш бўйича куч синашмоқда. Тадбир 10 ноябрга қадар давом этади.

Вилоят ҳокимининг
матбуот хизмати.

КУМУШ ТОҒЛАР ҚОЯСИНИ ТОНГ БИЛАН КЎЗЛАР ДЕҲҚОН...



“Пахта ва бошқа экин майдонлари оқилона ва жўяли бир тарзда қайта кўриб чиқилмаса, пахтанинг нарх-навоси унга сарфланаётган меҳнат ва жаҳон бозори билан мослаштирилмаса, қишлоқ аҳлининг аҳволи кескин яхшиланмайди, даромад буромадни тақозо этмайдиган бўлса, табиат, аждодлар ва авлодлар, тарих ва истиқболга дахлдор ғоят чигаллашиб ва чуқурлашиб кетган муаммоларни ҳал қилмасак, оғизда бошқа гапларни айтиб, амалда бошқа ишларни қилишда давом этсак, бундай пайтда нимани ислохотлаймиз ўзи?” деб ёзган эди устозимиз (у пайтда ТошДУ таржима назарияси кафедраси mudiri эди), профессор, публицист, олим Ғайбуллоҳ ас-Салом 1990 йили «Олтин тувак кимга керак?» мақоласида.

Кўп йиллардан буён ушбу муаммо Туркистон вилоятида ҳам долзарблигича қолмоқда. Мутасадди вазирлик ушбу экин учун экин майдонларини қисқартиришни тавсия қилмоқда. Бироқ пахтакорлар бунга шовилмаяпти. Гарчи улар эски ва янги муаммоларга дуч келишса ҳам. Бир нарсани аниқ: Туркистон вилоятида пахтачиликни тўхтатиш мумкин эмас.

(Давоми 2-3-бетларда). ➡

»»» “Жанубий Қозоғистон” – ҳар бир хонадонга!

“ЖАНУБИЙ ҚОЗОҒИСТОН”НИНГ ОРИСЛИК ЖОНКУЯРЛАРИ



Сайрам туманидаги Тоштемир Рустамов номли мактаб Орис қишлоғидаги пешқадам жамоалардан. Бугунги кунда ушбу даргоҳда 1470 нафар ўқувчига 200дан зиёд устоз таълим-тарбия бермоқда.

– “Жанубий Қозоғистон” – сеvimли ва қадрдон нашрим. Узоқ йиллардан буён унга дўстман. Зеро, ҳар бир инсон даврий нашрлар орқали сиёсий хабарлардан воқиф бўлиб, маънавий озуқа олади, – дейди биз билан мулоқотда муассаса директори вазифасини бажарувчи Малоҳат Усмонова.

Нашримизни доим қўллаб-қувватлаб келаётган устоз-мураббийларга миннатдорчилик билдириб, келгуси ишларига муваффақиятлар тиладик.

3. МҮМИНЖОНОВ.

Тасвирда: устозлар “Жанубий Қозоғистон” газетасининг янги сони билан танишмоқда.

6 ОЙГА ОБУНА БАҲОСИ:
«Қазпошта» ХЖ орқали –
Туркистон вилояти бўйича – 3415,50 тенге;
Шимкент шаҳри бўйича – 3095,15 тенге.

НАШР КЎРСАТКИЧИ: 65466

»» Туркистон – халқаро туризм маркази

ЗИЁРАТЧИЛАР МИННАТДОР

Туркистон вилояти маркази Туркистон шаҳри халқаро туризм маскани сифатида равнақ топиб, кундан кунга ободонлашмоқда. Давлатимиз томонидан белгиланган режа, яъни бир йилда 5 миллиондан зиёд зиёратчиларни қабул-лаш имконига эга шахримизга ташриф буюраётган меҳмонлар улар учун яратилган қулайликлардан беҳад миннатдор.



Яқинда Тошкент шаҳридан “Ногиронларни иқтисодий-ижтимоий қўллаб-қувватлаш маркази” бошқаруви раисаси Юлдузхон Мирзакаримова раҳбарлигида бир гуруҳ зиёратчилар Туркистонга ташриф буюришди. Зиёратчилар икки кун давомида Арслонбоб, Аҳмад Яссавий, Уккоша ота мақбараларига таш-

риф буюриб, тарихий обидалар билан танишдилар. Туркистон шаҳридаги жаҳон туризм андазаларига мос келадиган барча бунёдкорлик ишлари зиёратчиларда улкан таассурот қолдирганини мен нафақадаги устоз ҳамда шу табаррук шаҳарнинг кекса фуқароси сифатида фахр билан таъкидлайман.

Ўзбекистонлик зиёратчилар Яссавий мақбарасидан унча олис бўлмаган хусусий меҳмон уйида бир кеча кундузда уч минг тенге ҳақ тўлаб, бир кеча тунадилар. Уларга мақбул баҳода миллий таомлар ҳам тақдим этилди. Хуштавозе меҳмондўстлик, яратилган барча қулайликлардан ўзбекистонлик зиёратчилар беҳад хурсанд бўлишди.

Зиёратларингиз қабул, му-родларингиз ҳосил бўлсин ҳур-матли ҳолис ниятли азиз меҳмонлар.

Ҳасан ШЕРМЕТОВ,
Туркистон шаҳри,
Бирлик кичик тумани
оқсоқоллар ҳайъати аъзоси.

Тасвирда: ўзбекистонлик зиёратчилар Яссавий мақбара-си ёнида.

Ҳабиб МАННОПОВ тасвири.

ЎҚИШ, ИЗЛАНИШ, ЎРГАНИШ – КОНИ ФОЙДА



Ҳадис китобларида инсон учун илмнинг нақадар зарурлиги алоҳида таъкидланган. “Бешикдан қабргача илм ўрган”, деб, илм ҳар нарсадан юксаклиги кўрсатилган. Етук олимми, оддий ўқитувчиси доимо изланиш, ўрганиш, билимини мукаммаллаштириши лозим. Яна шу ўринда ҳадиси шарифдан “Илмга илм олмоқ йўли билан эришил-гайди. Илмни Чин (Хитой) да бўлса ҳам ўрганишлар...” каломини мисол келтирамиз.

Дарвоқе, жорий йилнинг октябр ва ноябрь ойларида “Өрлеу” вилоят малака ошириш институти томонидан ўзбек тили ва адабиёти фани ўқитувчилари учун малака ошириш тадбирлари ташкил этилди.

Ўзбек тили ва адабиёти фани ўқитувчилари касбий маҳоратини оширишда анча қийналиб қолган эдилар. Сабаби, фан мутахассислари учун “Өрлеу” томонидан алоҳида курслар ёпилиб, ўзбек тилшунослари рус тили, қозоқ тили ўқитувчилари билан ўқиётган эдилар.

Тилимиз фидойилари Маҳфуза Мусаева, Шаҳноза Алиқабарова, Фотима Тошметова-ларнинг саъй-ҳаракатлари натижасида бошланғич синф ўқитувчилари ҳамда ўзбек тили ва адабиёти фани ўқитувчилари учун курслар ташкил қилинишига эришилди.

Биз Саврон тумани ва Туркистон шаҳри ўқитувчилари Қорачик қишлоғидаги “Тўран” номли умумий ўрта мактабда таҳсил олдик. Таълимни таш-

киллаштиришда “Өрлеу”нинг катта ўқитувчиси Маҳфуза Мусаева жонбозлик кўрсатди.

Икки ҳафталик ўқиш давомида турли ёшдаги, турли тоифадаги устозлар билим соҳасидаги янгиликлар, янги технология асослари билан танишдик, фикр алмашдик. Бир сўз билан айтганда, билимимизни чархладик.

Бу курс бизда улкан таассурот қолдирди. Ушбу ўқишни ташкил қилган “Өрлеу” марказининг катта ўқитувчиси, курсимиз раҳбари Маҳфуза Мусаева, “Тўран” мактаби маъмурияти ва мактаб жамоасига миннатдорчилик билдирамиз.

Насиба ҒАФУРОВА,
Муассар ЗАРБИТДИНОВА.

Грузиянинг Тбилиси шаҳрида ўсмирлар ва катталар ўртасидаги спортнинг тенглик тамойилига асосланган унифайд туридан Жаҳон чемпионати ўтди. Унда бир жамоада ақли ривожланишда нуқсонни бўлган ва соғлом атлетлар иштирок этади. Ушбу чемпионатда арисликлар 4та олтин, 1та бронза медални қўлга киритишди.

АРИС СПОРТЧИЛАРИ ЖАҲОН ЧЕМПИОНИ

Олтин медаль совриндорлари орасида уч карра жаҳон чемпиони унвонлари совриндори Аяжан Ергентай, Жанель Алтинбек, шунингдек, бир уйдан келган икки нафар қиз Акнур Адил ва Медина Адил бор. Ғолиб қизларнинг мураббийи Асхат Кумисбекули мазкур мусобақада катталар ўртасида III ўринни эгаллади. Яна бир ҳамюртимиз Бўлат Тўқсанбай бронза медални соҳиби бўлди.

Натижада, Қозоғистон спортчилари умумжамоа ҳисобида биринчи ўринни эгаллашди.

“NARLEN” – ЙИЛНИНГ ЭНГ ЯХШИ МАҲСУЛОТИ

Алмати шаҳрида ўтган “XVII AgroWorld Qazaqstan 2023” қишлоқ хўжалиги халқаро кўргазмаси Туркистон вилояти “Қарқын – 2030” МЧБнинг “Narlen” маҳсулотлари “Энг яхши маҳсулот” номинацияси ғолиби бўлди.

“Атакент” кўргазма марказида ўтган тадбирда жаҳоннинг 22 мамлакатидан 155та ишлаб чиқарувчи компания ўз маҳсулотларини олиб келишди. Улар қаторида Австрия, Бельгия, Буюк Британия, Германия, Дания, Испания, Италия, Корея, Туркия ва Франция-

нинг йирик компаниялари бор.

Таъкидлаш жоизки, қолбаса ва гўшт маҳсулотлари ишлаб чиқарадиган “Қарқын – 2030” МЧБ 14 йилдан буён мамлакат бозорида етакчи.

Вилоят минтақавий алоқалар хизмати.

»» Премьера

Шимкент шаҳар ўзбек драма театрида янги премьера – “Танҳо юлдуз” лирик драмаси томошабинлар эътиборига ҳавола этилди. Театр ихлосмандлари интиқиб кутган тақдиримотда томошабинлар гавжум бўлди.

Нурилло Аббосхоннинг пьесаси – уч бева дугонанинг ўзаро муносабати ҳақидаги ғамгин ва айни пайтда кулгили ҳикоядир. Спектаклда юморга муҳим ўрин ажратилган. Унинг қаҳрамонлари эса ҳар қандай вазиятда ҳам тушқунликка тушмасликка ҳаракат қилади.

Асардаги асосий ғоя дунёвийлашув жараёнининг ота-она ва фарзандлар муносабатига таъсирини ёритиб беришдан иборат. Спектаклнинг ҳар бир сахнаси кутилмаган воқеаларга бой.

Ўғилларини уйлантириб, қизларини узатиб, ёлғизла-ниб қолган аёлларнинг тақдири тўғрисидаги комедия фарзандларни ота-оналарини қадрлашга ундайди. Спектаклни томоша қилган одамлар бева аёллардан кўра,

“ТАНҲО ЮЛДУЗ”



сўққабош қолган оталарнинг қисмати огир эканлигига амин бўладилар. Асарда ҳозир “камёб” бўлиб бораётган меҳроқибат улуғланади. Инсон, унинг қадр-қиммати, ёшлар тарбияси ва фарзандлик бурч каби юксак ғоялар томошабини бефарқ қолдирмайди. Кексаларга ҳурмат-эҳтиром кўрсатиш, эъзозлаш, уларнинг кўнглини шод этишга ундайди.

Театр актёрлари Одилжон Тўғонбоев, Зулкарна Тўғонбоева, Савринисо Рўзиметова, Венера Нишонбоева ва Клара

Шодибековаларнинг маҳорати асарнинг умумий руҳини очиб берди.

Спектаклнинг муваффақиятли чиқишида либос устаси Муборак Тошметова, тикувчи Дилфуза Мирсодиқова, овоз оператори Дилшод Ақромов, сахна устаси Отажон Айметов, чироқ устаси Фаррух Ҳаким-жонов, гримчи Василя Абду-рахмоноваларнинг меҳнатини алоҳида таъкидлаш жоиз.

Театрга келинг, “Танҳо юлдуз”ни томоша қилинг!

Хуршид ҚўЧҚОРОВ.


»» Обуначиларимиз орасида



Туркистон шаҳрига бе-рилган – туркийлар ола-мининг маънавий пойтах-ти, мақомининг масъулияти залворли. Маориф соҳа-си фахрийси, Ҳамза номли мактабнинг кекса, собиқ ўқувчиси Тўхтапўлат Тилеу-лиев қаламига мансуб «Тил бойлиги – миллат бойлиги», деб номланган 124 саҳифа-ли янги китоб (тасвирларда) нашрдан чиқди.

Бунга қадар иқонлик Қав-миддин Ат Итқоний, респуб-лика миқёсида машҳур спорт-

ТЎХТАПЎЛАТ АКАНИНГ КИТОБИ



– одамларга туҳфа сифатида тўн эмас, китоб совға қилиш ташаббусини ўзи амалга ошир-ди.

Рўйхат асосида билим ман-баи бўлган китоб ҳамюртларга туҳфа этиб берилди. Янги ки-тобнинг бир қисми Туркистон шаҳар ўзбек этномаданият бирлашмаси раиси Баҳодир Ирисметов ҳамда «Ўлес» хай-рия жамғармаси раиси Райим-жон Қўчқоровлар ҳомийлигида кутубхоналарга топширилади.

«Жанубий Қозоғистон» га-зетасининг доимий обуначи-лари – китоб муаллифи ҳамда ҳимматли ҳомийларга таҳри-рият номидан миннатдорчилик билдирди.

Ш. МАДАЛИЕВ.
Муаллиф тасвирлари.

»» Муштарий илҳоми

ХОҲ ИШОНИНГ, ХОҲ ИШОНМАНГ...

(Воқеий ҳикоя)

Очигини айтсам, бу воқеаларни ёзи-шимга одамларнинг ҳажв ва кулгу, лоф ва ёлгон, олди-қочди хангома-ларга ўчлиги сабаб бўлди. Улфатлар билан навбатдаги учрашувимизда жўрабоши Аҳмад (исми ўзгартирилган) сўхбат мавзусини «Бир ку-лишайлик» деб номлаб, қизқарли ҳикоя-лардан сўзлашимизни тавсия қилди.

– Бир воқеани айтиб берай, хоҳ ишонинг, хоҳ ишонманг, – деб бошлади ҳикоясини Жавлон исмли дўстимиз. – Қишлоқда бир қария вафот этибди. Қабристон 20-25 қақирим нарида экан. У ердан тобутни олиб келиш учун усти очик юк машинасига буюртма берилибди. Ҳайдовчи қабристондан тобутни олиб келаётганида ём-ғир ёға бошлабди. Йўлда уни бир мўйсафид тўхтатибди, йўловчини кузовга миндирибди. Мўйсафид ёмғирдан паналаш учун тобутга ётиб олибди. Йўл-йўлакчи яна икки киши қўл кўтариб, улар ҳам машинага чиқишибди. Бир маҳал тобутдаги одам ёмғир тинганмикин, деб қўлини чиқарибди. Ёнидагилар бу ҳолатни кў-риб, ўзларини ерга отишибди...

Даврадагилар “Тавба!” дея, бир тин олишди.

Сўз навбатини Тошматовой олди.

– Хоҳ ишонинг, хоҳ ишонманг, – деб бошлади у ҳам. – Бир кун эрталаб кўчага чиқсам, қўш-ним Элмурод: “Марказга борсангиз, мени ҳам олиб кетинг”, деб илтимос қилиб қолди. Бирга шаҳарга кетдик.

Шу кунги қишлоғимизда адашим – Тошматовой деган қария вафот этган экан. Хабарни эшит-ган Элмурод уйига келиб, аёлига: “Ҳа, бечора, жойи жаннатда бўлсин”, дея эрталаб мен билан бирга бўлганини айтибди. Бу совуқ хабарни аёл маҳалладаги дўкончига етказибди. Сотувчи аёл дўконига кирган невараларимга юзланиб:

“Сизларни буванг хўп яхши одам эди, жойи жаннатдан бўлсин”, деб дуо қилибди. Бунни эшитган невараларим уйга келиб, воқеани рафиқам ва келинимга айтишибди. Уйда йиғи-сиғи, қий-чув бошланибди. Қариндош-уруғлар йиғилишибди. Ишдан қайтганимда бу ҳолатни кўриб, ҳайрон бўлдим. Суриштирсам, мени аварияга учраб, ҳалок бўлди, дейишган экан...

– Сен ҳам оширвординг, – дея сўзни олди Дилмурод. – Худойида бир уй аёллар ўзаро сўхбатлашиб ўтиришган экан. Ҳали-вери хиз-матдагилар чой олиб киришмабди. Икки аёл бир-бирига: «Нега чой олиб киришмаяпти?» де-са, «Ҳали самовар қайнамабди», дейишибди. Бу сўзни уларнинг ёнида ўтирган аёл эшитиб, навбатдаги аёлга, у эса кейингисига етказибди. Бу гап биринчи сўзлаган аёлга қайтиб келибди. У нима гап, деб сўраса, ёнидагилар: «Эшитма-дингизми, Самарқандни сув босибди», дейи-шибди...

Хоҳ ишонинг, хоҳ ишонманг! Хулоса – ўзин-гиздан!

Гурунглашиб қолса агар аёллар, Сўхбат қизир, янгиликдан сўзлашар. Бир-биридан ўзиб кетар, лоф уриб, Хоҳ ишонинг, хоҳ ишонманг, жўралар.

Тонг саҳарда молни қўшғач подага, Турфа ёққа олиб кетар хаёллар. Бир қарасам, моллар турар жойида, Кеч бўлагани билмасмикан аёллар?..

Ўлмаганини ўлди, деган оломон, Лоф уради, қизиқ булар бу замон Об-ҳавони айтиб берар бегумон, Хоҳ ишонинг, хоҳ ишонманг, жўралар!

Каримкул ПЎЛАТБОЕВ.

Директор – Бош муҳаррир Райимжон Ортықбой ўғли АЛИБОВЕВ.	Масъул шахслар: Туркистон, Саврон — Шомирза МАДАЛИЕВ. 8(72533) 2-40-07. Кентов, Сўзоқ – Рўзиохун МАДАЛИЕВ. +7708-824-20-97. Тўлебий — Баҳорой ДУСМАТОВА. 8(72547) 6-07-16. Қазигурт — Хуршид ҚЎЧҚОРОВ. +7-701-447-37-42. Сайрам — Зокиржон МҲМИНЖОНОВ. +7-702-278-96-90. Тупкибош — Мунира САЪДУЛЛАЕВА. +7-747-144-60-71.	Муассис – Туркистон вилояти ҳокимлиги. Мулк эгаси — “Жанубий Қозоғистон” вилоят ижтимоий-сиёсий газетаси таҳририяти” масъулияти чекланган бироқарлиги.	МАНЗИЛИМИЗ: 160000, Шимкент шаҳри, Тауке хан шоҳқўчаси, 6-уй, 3-қават. Телефон: 53-07-10. Телефакс: 53-04-66. Электрон почта: Janubiy@inbox.ru
Бош муҳаррир ўринбосарлари: Муроджон АБУБАКИРОВ. Авазхон БҮРҒОНБОВЕВ.	Масъул котиба — Шаҳноза УСМОНОВА.	● Мақолалар, эълон ва билдирувлардаги факт ҳамда далилларини тўғрилик учун муаллифлар, реклама ва эълон берувчилар масъулдир. ● Фойдаланилмаган мақолаларга ёзма жавоб қайтарилмайди.	Газета ҚР Маданият ва ахборот вазирлиги томонидан 2020 йил 21 апрелда рўйхатга олинди. КЗ34УРҲ00022503 гувоҳнома берилган. “ERNUR-print” МЧБ босмахонасида chop этилди, Шимкент шаҳри, Т. Алимқулов кўчаси, 22.
	Қозоғистон Республикасида тарқатилади.	Нашр кўрсаткичи — 55466. Адади — 12100 нусха.	Буюртма: 2814 Навбатчи муҳаррир: Малика ЭЛТӨБЕВА.